

臺灣歷史文獻叢刊

臺灣光復五十週年紀念

臺灣鄭氏始末



臺灣歷史文獻叢刊

臺灣鄭氏始末

臺灣省文獻委員會印行

臺灣歷史文獻叢刊

臺灣鄭氏始末

著者：沈雲

編輯者：臺灣銀行經濟研究室

發行人：簡榮聰

出版：臺灣省文獻委員會

地址：南投市中興新村光明一路二五二號

電話：(〇四九)三一六八八一、五

印刷：臺灣省政府印刷廠

地址：臺中縣大里鄉中興路一段二八八號

電話：(〇四)三三九三一、二六〇八

定價：精裝：新台幣一百六十元

平裝：新台幣一百一十元

中華民國八十四年八月三十一日

ISBN 957-00-5823-4 (精裝)

ISBN 957-00-5824-2 (平裝)

臺灣歷史文獻叢刊(明鄭史料類)

臺灣割據志
臺灣鄭氏紀事
閩海紀要
靖海紀事
臺灣鄭氏始末
海紀輯要
閩海紀略
海上見聞錄
賜姓始末
從征實錄
靖海紀略
靖海志
臺灣外志一、二、三、四
臺灣外記
鄭成功傳
鄭氏關係文書
東南紀事
平閩紀
海東逸史
鹿樵紀聞
鄭氏史料初編
鄭氏史料續編一、二、三、四
鄭氏史料三編
清代官書記明臺灣鄭氏亡事
閩中紀略
李文襄公奏疏與文移

重刊臺灣鄭氏始末序（明鄭史料類）

同治甲戌，牡丹社事起，沈文肅公治軍臺南，從郡紳之請，奏建明延平郡王祠，有云：「明末延平郡王賜姓鄭成功者，福建泉州府同安縣人，少服儒冠，長遭國恤，感時仗節，移孝作忠，寰宇難容洛邑之頑民，向滄溟獨闢田橫之別島，奉故主正朔，墾荒裔山川。」寥寥數語，鄭成功畢生志節表露無遺，足抵長篇大論，文肅公之言，真深知鄭成功者也。

昔清人入關，明祚垂亡，義師勤王，後先繼起，死難之烈，遠逾前代，如弘光時之史可法、隆武時之黃道周，以及魯王監國於浙、永曆即位於滇，率皆曇花一現，不旋踵即冰消瓦解，未克與清師爭雄，獨延平郡王異軍特起，支撐半壁東南，傳其子孫，延明祚三十餘年，至今偉烈豐功，猶堪頑廉立懦！

稽諸史乘，王初以一介儒生，慨於君王之蒙難，乃焚襦棄儒，樹招討大將軍幟，藉彈丸之金廈二島以抗清師，二次北征，所到處多望風投降，清廷亦爲

之震撼，迨師阻金陵，功敗垂成，遂驅荷夷而復臺灣，設職官、興學校、佈屯田，百廢俱舉，奈將星忽隕，齎恨以終，其遺恨固至深且痛，然王之精神氣節，則千秋不泯也。

王之先世崛起海上，傳子而孫，凡四世，史料浩瀚，諸如正史官書之載記，大臣將帥之奏疏，文人學士之著述，譜牒碑版之傳狀……等，皆彌足珍貴。各家所記，立場容或歧異，惟鈎玄探隱，歷史真相終不難大白於世，故仍無損其史料價值也，曩者臺灣銀行經濟研究室所刊「臺灣文獻叢刊」，相關史料蒐羅殆盡，嘉惠士林，功不可沒，爰以此為基礎，並新增若干，彙為一篇，重付剞劂，以廣其傳。

本書《臺灣鄭氏始末》，分六卷，沈雲撰。雲字舒白，號閒亭，浙江德清人，道光二十四年進士。所記臺灣鄭氏史事，起自天啓四年甲子鄭芝龍倡亂，至康熙二十二年癸亥鄭克塽降清止，其資料來源，據書首自敘，蓋以江日昇《臺灣紀事本末》為藍本，復參考他書，刪其繁蕪，析為六卷，改題今名，至而

書事蹟年月有不合者則仍之，本疑以傳疑之義也。

余忝掌臺灣省文獻委員會，以職責所繫，並感念長官之期望，無時不以文獻史料之蒐羅、保存爲念，庶先賢心血不致湮滅，而提供學者之研究素材，茲值本輯告成，謹綴數語，是爲序。

臺灣省文獻委員會
主任委員

簡榮聰

謹序於臺灣歷史文
化園區臺灣文獻史料館

中華民國八十四年三月

自敘

道光丙申歲（十六年），余在京師，從藏書家假得閩人江日昇臺灣紀事本末四十九篇。敘天啓甲子歲（四年）鄭芝龍倡亂、至康熙癸亥（二十二年）其曾孫克塽投誠而止；凡十數萬言，頗爲詳盡。惜體類小說，辭不雅馴。余因參考他書，刪其繁蕪，加以潤色。其事蹟年月有不合者，則姑仍之。蓋疑以傳疑，古人所尙，自非身親目接者固未見彼之爲是、而此之爲非也。書旣成，析爲六卷；題曰臺灣鄭氏始末，并識其緣起於簡端云。是年冬十一月德清沈雲自敘。

臺灣鄭氏始末目錄

卷一	自天啓四年迄順治三年……………	(一)
卷二	自順治四年迄順治九年……………	(二三)
卷三	自順治十年迄順治十四年……………	(三五)
卷四	自順治十五年迄順治十八年……………	(三九)
卷五	自康熙元年迄康熙十五年……………	(五五)
卷六	自康熙十六年迄康熙二十二年……………	(六七)

臺灣鄭氏始末卷一

德清沈 雲撰
烏程沈 垚註

臺灣懸大海中，北界彰化之雞籠城（在縣極北海中），南界鳳山之砂馬磯（縣東南二百三十里），縱輪近三千里；東背山，西面澎湖（島，在臺灣縣西五十里海中，臺灣廢城在今縣西南）。舊稱澎湖之東爲毗舍邪國，或曰毘舍那國；袒果睢于，習鏢弩。宋淳熙間，嘗有曾衆肆掠泉之水澳（寨，卽永寧衛）、圍頭（鎮，在晉江縣南一百里）等處。明嘉靖間，都督俞大猷嘗迫海寇林道乾於澎湖。道乾窮入臺，不樂其土，恣殺番衆，以血膏艇，棄之占城。而臺地之闕，實自鄭芝龍父子。

芝龍，南安人。父紹祖，爲泉州府胥。芝龍嘗兒戲，擲瓦牆外，誤中知府蔡善繼冠，折左翼；趣執，旣至，奇其狀而縱之。長益矯不羈。道廣東香山澳，傳市舶之日本。豔翁氏女，年十七，暱焉不反。

會海澄亡命顏思齊爲甲贏，蓋彼夷所立之統華人者也，豐積好施貸；與晉江販者楊天生善。天生謂：『日本達閩、粵、遼、句驪，得之可以自大』。轉鳩洪升、陳德、張宏、陳勳等二十八人，長思齊，而芝龍年少爲之殿。日本故於海隘置礮臺，列卒更戍。

因謀閒不意，脅殺戍者，還轍車內嚮，發徒衆縱火板屋，乘昏夜襲取要害，分奇席卷。隱祈天地盟，約定天啓四年夏六月將發。

翁氏婦夢巨魚觸膺，生子，男也；衆往賀，因誡芝龍勿疏秘於婦人。曰：『何至是？是非夫矣！』而同盟李英已醉，不謹；妻倭女王氏覺告，而翁氏父翼皇先奔告芝龍曰：『殆已！王兵將至！』乃速思齊等駛大艇乘風遯。已脫，凡艇十三。思齊欲之舟山（今定海縣），陳德謂：『密邇鄉土，各歸耳，難有固志；不若風利駛臺灣便』。僉曰：『善』。八晝夜乃至，計撫土番，立寮寨，以時出獵海上。時紹祖已先死，其羣從子姓歸者踵接。

而思齊以五年秋九月獵諸羅山反，病死。咸薦於皇天后土，卜以磁質杯二，曰：『邦伯不祿，莫長莫君，天庶新造，賚一人以父受祐那哉，則一俛一印而無小損者從』。祝已，乃次年擲杯。衆罔協；未至芝龍，允如祝。衆醜曰：『盍再！』乃數十試，皆俛印協且完。衆譴曰：『天與之！衆庇之矣！』東六年春正月旬有八日受終；芝龍固辭乃就。令曰：『淺淺懼不勝，敦顏駕茲，弗政曷俾？孰綱紀黜賞惟平，孰斤農食居者行者咸賴，孰司工肆庀廬艦甲兵惟良，孰修律度書識別旗表惟察，孰肄戰陳進止坐作攻守惟備，孰典祭賓、飾辭令、盛聲容、豫占候、巽條故咸周，孰安上下、徠豪俊、聖邪調、納規誨克均無愆。其東十八人任仔棊予以符旬有八日之應。上帝享予咸休，其或不享咸劉；

威其戒哉！命不貳爽！不以實受而債不濟者差罰勿赦。東而身覺不任者讓免」。芝龍乳字一官，至是更焉。更其弟芝虎、芝豹、芝鵬、芝燕，餘十三人皆以芝叙。

二月，以楊天生、洪升參軍事，楊經、李英總餉軍，陳勳、林翼督造戰艦，陳德、張宏爲監軍。芝龍帥艇十（艇各軍士六十）、偵事艦二（艦各二十五人），儲一月糧，於三月犯金門（卽浯洲嶼，同安縣東南五十里海中），又犯廈門（卽嘉禾嶼，同安縣西南五十里海中）。夏四月，犯廣東靖海（在潮之惠來縣東少南六十里）、甲子（舊在惠之海豐縣東南一百五十里，今陸豐縣東南一百里）二所。所設指揮千百戶轄軍士，無禦寇者，徒馳羽檄報寇執鋒盛不可當；當事悚慙上聞。或以蔡善繼嘗善芝龍，說巡撫爲招安計；卽起善繼泉州巡海道，持撫臣朱欽相檄，遣旗鼓黃昌奇入海。芝龍方孱滌戰艇於湄州（在莆田縣東南九十里海中），稔昌奇故亦泉州府胥，與紹祖善，重不忍違善繼意，允就撫。而陳德等皆不欲，乃別六艇遣還臺灣俟後命。而自與羣從統十二艇、衆八百餘人，入泉州港謁蔡。會欽相疾，月餘不報。芝虎因說曰：「撫臣意不測，速去之便」。芝龍猶豫，且重負蔡。虎又曰：「書生耳，弇事體，不速將及！」卽夕駕汐出泊圍頭外灣。部羣從厲兵攻海豐，下之；又攻嵌頭（莆田縣東六十里）。又連破甲子、靖海二所。

七年春正月，還泊漳浦之舊鎮（縣東南）。巡撫朱一馮檄都司洪先春等會戰於將軍澳（縣東南）。先春還舊鎮。芝龍屯六鰲外嶼（縣東南七十里），偵先春檄調鎮海（衛城

，在縣東北一百里）、懸鐘（銅山西南，詔安縣東南四十里）、銅山（陸龜西南，詔安縣東八十里）、六龜（鎮海西南）各衛所軍士，兼募沿海鄉勇。芝豹夜率二百人，持海豐所獲鄉勇旗幟，乘岸雜鄉勇中以待。越日，先春出港口戰，芝虎不勝。芝豹起岸上夾擊之，先春大敗，遯金門。一馮卽令金門遊擊盧毓英會勦。芝龍令羣季伴爲商舶並小艇，唱漁歌，分伏島嶼間；而自領數艇迎戰。毓英少之。芝龍復佯敗。毓英駛進，伏出，弓弩齊發，遂擒毓英。芝龍以禮遣還，屬道嚮者就撫意。毓英還廈門，謁都督俞咨臬，言芝龍可撫狀。咨臬者，大猷子也，怒責毓英。毓英至泉，復以可撫狀告知府王猷。猷心是之。而咨臬已至一馮所，罪毓英失機，繫獄。更檄千戶馬勝、百戶楊世爵擊芝龍，至將軍澳中伏皆死。咨臬又檄副總兵陳希范遏戰於杏仔，又敗，洪應斗、張選舉沒焉。咨臬大慚；調閩安（鎮，在縣東四十里）、興化、永寧（衛城，在晉江縣東南六十里）、銅山、六龜、懸鐘、鎮海、金門諸將會議中左所（卽廈門）。芝龍偵諸將惟王飛熊、林盛、李夢斗精水戰，餘子碌碌不足數，乃分十艇爲前鋒，分八艇出青水溝，約日中由東碇會；分四艇左右翼，而自帥中軍六艇策應，夜先發。及旦，遇咨臬軍。芝虎鼓前鋒壓之，戰林盛、李夢斗，至日中不決。芝龍乘閒橫擊。而東碇艇新軍奮起，咨臬急麾分敵，而諸將誤謂退師，遂大亂。芝龍縱擊。軍將溺失無算，咨臬遯入廈門，遽令指揮傅珪統十五艇抵禦南山。芝龍至，又大敗之。咨臬遯三汊河（在舊鎮東北、龍溪縣東南）。先是

朱欽相撫海寇楊六、楊七，咨臬實主其議。及中左之戰，皆率衆先遜。漳州工科給事中顏繼祖劾咨臬、希范，逮問。

崇禎元年，王猷復以撫議說巡撫熊文燦。文燦下巡道鄧良知議。問誰可使芝龍者，猷以毓英對。卽白文燦，自獄中釋之使往。方是時楊六、楊七叛烏洋，劉香老擾惠、潮、南澳（在詔安縣西南百餘里，饒平縣東南一百六十里海中，有三城，去懸鐘澳口三十餘里），褚彩老劫沿海，李魁奇攻掠澎湖、遼羅等處，最橫。魁奇，惠安漁人，能竟日行水中。初聚衆澎湖，候劫呂宋國船。陳德等同臺灣，聞芝龍受撫不決，以衆來會；至澎湖，爲魁奇所劫，德及楊天生等皆死，免歸臺灣者惟李英與通事何斌。芝龍聞之，大恚。秋九月，毓英說芝龍降；徧賂當事，皆喜。遂詐以義士鄭芝龍收復鄭一官奏聞（一官，芝龍乳名，詳見前），官爲防海遊擊，復盧毓英監其軍。芝龍曰：「世無君子，天下皆可貨取耳！陳平之閒項也，黃金勝百戰矣。」

二年夏四月，芝龍攻殺魁奇於遼羅，取其首祭陳德等，盡降其衆。六月，遂斬楊六、楊七於浯洲港（卽金門）。秋八月，褚彩老寇閩安，芝龍追滅之於南日（山，在興化府城東百里大海中）。

三年夏五月，遣弟芝燕往日本迎歸翁氏及所生子，而倭婦先未有入中地者，不許。芝龍命統戰艦數十逼竟上，乃以所生子先歸，年七歲；芝龍喜其貌偉，名之曰森，字曰